

錦里耆舊傳



國家圖書館 NATIONAL CENTRAL LIBRARY, TAIWAN, R.O.C.



003678

國立中央圖書館藏善本	
書碼:	史部編年類通代之屬
書名:	錦里耆舊傳
著者:	宋印廷慶撰 四卷 一册
版本:	舊鈔本

全幅
(公分)

24.5 X 16.8

01717

1 册



錦里耆舊傳卷一起中和五年正月至蜀武成元年

前榮川應靈縣令勾延慶纂

正月地動一月十餘度以七曜占之多兵饑饉三

月改光啓元年夏四月維州山崩石墜飛塵滿空

五月除授顧彥朗東川節度使

二年東川遣鄭君雄率衆侵畧至德陽縣殺破斬鄭

君雄又帝厚自峽中率兵據左綿僖宗皇帝到京後

天下十道共修京闕之次胡魯子及燒悉盡駕幸寶

雞又幸山南干戈復起四海不寧



三年冬十月十軍軍容使田令孜除授西軍監軍使十一月到府

昭宗皇帝即位改元文德元年 秋八月除授韋太尉昭度劍南西川節度使陳太師知之乃治兵講武更置黃頭軍三都監軍使以書名召閬州王司徒建計其過綿水即出兵拒之將激其怒必攻諸州所在發兵交戰冀韋太尉來以兵隔之則誣以王司徒起兵侵境 九月王司徒大軍至閉城門不納 冬十月丁卯川軍與王司徒戰川軍敗退入城是日天色

陰慘先主廟上黑霧起至暮王司徒抽軍回七里亭丙子王司徒引軍入漢州界攻剽四面州縣東西兩川皆懼之

龍紀元年春二月庚午陳太尉發軍與王司徒大戰于三郊川軍敗績于是別修濠寨點丁牢城 夏四月軍容招前定戎軍節度楊晟建節于彭州與陳敬瑄為裏也 五月三都軍敗退歸府城王司徒據漢州城出軍把斷北路又弼牟鎮下先鋒寨新都縣下中軍寨 秋七月節度使韋太尉到川用王司徒為

衙內都指揮使奏割邛蜀黎雅四州充永平軍節度使川庄陳太師軍城韋太尉具旌節于城下以示城內百姓軍人告之曰新使在此何閉城門陳太師令左右詬罵城下云有鐵券見在豈可違先帝命乎王司徒于東北面下寨韋太尉城西北下寨未經旬日嘉眉州降

大順元年春正月分兵擊邛州都知兵馬使任可知殺刺史毛湘以城降又東川助兵三千人城外置軍行府徵科諸州稅賦嘉眉州運糧供軍內饑乏死者

不可勝數父母妻妾離釋不相保養居人多以藜藿充濟皆有菜色殍仆者甚衆軍人多偷刈新麥每一斗直二千餘金亦潛于韋太尉寨市易鹽相次人數稍多遂成隊有聞于太尉太尉曰一城飢餓忍不救之並不要問城內亦有聞于陳太師太師云吾尚恨無計救卹一任遂便以此稍布市井夏五月城內乏食民俗惶惶相欺凌無有怕惧所在斬殺處處暴尸其有軍都處則稍開別街巷則寂靜是月資雅黎三州相次歸降時以攻圍日久其城未拔王司徒

白韋太尉曰今領教萬之衆勞師以事蠻夷近聞洛陽以來藩鎮相噬朝廷姑息不暇主上憂勞不如以兵威靖中原是國之本相公盍歸覲面奏此事韋公然之翌日又諷三軍于行府門告糧闕乃執韋公親吏駱別鶴鬻而食之韋公益懼因召王司徒謂曰某年衰風恙恐不任持已具奏聞即便離任今表申奏署授司徒卽度留後行營招討使候至瀾庭奏聞請降西川旌節在後更係功業以慰民望乃以牌印授之六月己卯進發王司徒祖餞送至新都韋公請

回無更遠離幃帷韋太尉發後王司徒移居中軍寨城內百姓往來交易販米入城以竹筒量賣截筒深一寸闊一寸二百文須三五人共賣一人接錢兩人把手定則以米寫衣袖中將歸斫之煮湯共喫老弱者難買或聚或散固無行鋪街巷飢人死者無數或遇一夜風雨來日便成

白 冬十月發兵圍趙州

大順二年秋城內糧盡 八月庚寅陳敬瑄田令孜開城門攜牌印出降王司徒與之並轡入城安撫軍人百姓放陳太師歸花林坊本宅田令孜歸碧雞坊

宅時克定州府之後以萬民久罹塗炭初見廓清行
際蕩之恩布寬仁之令

景福元年春有詔貶田令孜授湖南監軍陳敬瑄于
雅州安置王司徒慮其生變縊令孜于府城斬敬瑄
于新津具表疏其惡也

三年夏虢城內窘感初年米每斗五千第二年十千
三年糧盡百姓通相啖食 五月庚申楊晟自劾城
門閉自景福元年五月二十日圍城至三年五月二
十三日首尾三年蓋楊晟不識天時致害民庶 秋

七月與東川顧相公修好結秦晉之姻是歲改為乾
寧元年

二年春三月創徵雜稅綾一疋一百文絹一疋七十
文布一疋四十文猪每頭一百文時修寶麻寺有僧
智廣俗姓崔氏善救病以竹片為杖拍其痛處決之
無不立愈癰者便伸跛者能行其餘疾苦應手痊損
川主司徒崇重之請于寶麻寺為人療病所得錢物
回用修造遂于寺內五丈天王閣下居止于是焉者
競來皆得痊愈日獲三五千告諸貧者不用施錢時

號聖僧師本在雅州開元寺揭帝神堂內居

三年起軍收東川

四年秋九月平定東川

五年秋九月改為光化元年江濱池魚無數皆死浮出水面長尺餘以車般之送於城外

二年秋八月差發決雲軍使田師侶統押兵士三指揮收獲瀘州次克巴蓬壁三州

三年春三月田師侶移軍收渝州

四年改元天復元年封蜀王

二年春三月發舟師一萬五千人鑿峽是歲大水嘉州漂蕩尤甚時有咒土僧念尊勝修淨衆寺

三年三川晏寧五稼豐稔梁漢夔峽東西五千餘里山河肅靜

六年昭宗皇帝遇害 少帝禪位梁時三軍縞素舉哀

七年秋九月文武勸進羣議云云蜀主即皇帝位改唐大復七年為武成元年郊祀天地大赦境內赦文曰圓蓋方輿萬彙共資其覆載春生夏長四時不息

予推遷所以茂成成功寧遂物性帝王取象文質遷
興遵革故之令獸敷鼎新之至理朕上膺曠命俯徇
樂推宗廟告虔孝思既展郊丘備禮嚴配式遵欽承
享國之符允叶奉天之道祀羣咸秩有感必通雲龍
方覩予在天雷雨頃聞予作解且湯開三面延景祚
六百餘年漢革五刑繼五刑二十四皆以恤辜宥
罪勸善興仁特行滌蕩之恩用致洽平之化自唐朝
運改土德數終初乃召寇以纏兵竟至遷都而滅國
賢良墜炭朝市邱墟生人既失其所天大事須歸予

有土遂至蠻夷滙款士庶傾心謂蜀都同章武之時
兼漢嗣絕山陽之號共陳天命屬在朕躬一從踐位
以來益軫臨深之懼每念生民墜炭刑政猶繁因告
類予寧旻合流恩於屬縣紀年定歷既正鴻名布澤
行春式和均氣可大赦天下改唐天復八年為大蜀
武成元年正月十日昧爽已前大辟罪已下罪無輕
重已發覺未發覺已結正未結正見繫囚徒常赦不
原者咸赦除之唯十惡五逆屠牛鑄錢固意殺人捏
竄造印結聚徒黨逃走背軍合和毒藥私鹽茶麪持

仗行劫官典犯枉法贓兼淪濫身名冒授官爵罔圖
之內官吏用情致令寬濫不問有贓不在赦限左降
官不問罪輕重並與量移其有情無狡蠱事不邪者
委中書門下酌量矜貸使與牽復授官州縣典吏及
諸色人配流在遠已經懲斷者並宜釋罪放歸兼有
軍人百姓先因公事闕連逃避諸州縣鎮不敢歸還
者亦任却歸本貫所在不得勘問擾攪朕自援旗誓
衆仗鉞平戎廓定封疆安保生聚克成帝業實用武
功每思將帥之勞宜獎初終之効其在城及東川山

南武定武信武泰等道并西路前軍諸鎮都頭節級
將士等一時即位日雖已各有頒賜既經大禮更示
殊恩應都知兵馬使已下至節級官健今有優給各
有等第處分稼穡雖登黎元未泰每于旦夕常所焦
勞將漸致于昭蘇已累行其矜放但念方屯師旅難
關賦征緣同切于乂安宜共資其贍給自去年八月
已後十月已前繼有指揮併蠲逋欠非無惠澤不及
丞人尚慮疲羸未息艱苦畿內諸州及諸州府應徵
今年夏稅每貫量放二百文今年正月九日已前應

在府及州縣鎮軍人百姓先因侵欠官中錢物或保
累填賠官中收沒屋舍莊田除已有指揮及有人徑
管收買外餘無人射買者有奉主及妻兒見在無處
營生者並宜給還却據元額輸納本戶稅賦冬選之
人例聞羈旅常思任用以救棲遲兼勸進官僚人數
不少朕昨纔登寶位更布備息或擢在班行或委之
州縣凡選用略盡搜羅其間或有謬結前銜妄稱入
仕既未辨其真偽又可哀其困窮是用銓衡冀分玉
石切在精研選士擴實推公自執規繩勿隨請託但

曾經赴任委不敗官不犯刑章又無賊污告未圓備
考課分明便仰依次注官銓司不得稽滯如有失墜
告未無以自明但有失墜時公憑及于本任官處取
得文解者並准例參選然則自唐朝兵革之後偷濫
尤多附勢力者未必有材抱孤直者或聞無位自今
已後委有司博求幹濟慎擇端良諳熟吏途詳明法
律先能潔已方可理人就中令錄之尤雅切在銓衡
之精選或有節度剌史上表論薦皆須審諸行事顯
著才能保無苛虐之心方允奏陳之命如聞失舉必

罪所知諸州府或有賢良方正能直言極諫達于教化明于吏才政術精詳軍謀宏遠韜光待用藏器俟時或智辨過人或詞華出格或隱山林之迹或闡鄉里之稱仰所在州府奏聞當典量材叙用自唐室傾淪梁園篡奪上國俄成于茂草中原莫有其遺民三百年之文物一空數千里之生靈無主星辰既紊運祚俄遷指王氣之東沉聽頌聲之西起率土之黔黎老幼竟獻臣心滿朝之文武忠賢皆陳天意克隆基業合重獎酬應内外文武官等或賜功臣名號或与

一子出身兼勸進官資以旌勲業並當續有處分朕傾事唐臣嘗居親衛受藩鎮封崇之貴著冊書鐘鼎之勳至于朝右公卿方面侯伯皆契忘家之誓俱同許國之誠其沒身王事之中遇翫賊庭之內言念及此痛憤良深應自僖宗朝凡在有功文武大臣顯忠孝者並委中書門下追贈仍搜訪骨肉量材錄用又在瀾州起義之日應有隨駕大將効命功臣或遭疾以淪亾或當鋒而夭枉皆是捐軀為主臨難喪生殊功甚日而暫忘遺烈千年而不泯並委中書門下抄

錄次第各与退贈有子孫者特授官祭所奠澤被幽
明仁霑存没又自朕剖符之始分閩已來副予委用
之心匡贊勲庸之士同甘共苦竭節輸誠推不避
于流言臨事唯思於畫瘁則有故武信軍節度使張
琳操持勁直才術縱橫成今日之鴻基自斯人之懿
績不享朝天之祿遽興失手之悲言念前功常思厚
報宜追贈太尉以報幽寬其嗣子更加正官仍贈章
綬故山南節度使王宗綽早膺任用累著勲勤征行
不憚于風塵陳敵常先於士卒論其實効可謂勞臣

吾何以富貴生驕突殃自掇不守初終之節遽萌悖
慢之心驗人情而共憤滿盈定國法而難私斯割逆
行憲典深用矜傷當景運之初興在故臣之可念宜
加洗雪用慰幽寘宗滌並却還在身官爵故茂州刺
史張造故蜀州刺史李師恭故邛州刺史李簡故眉
州刺史張勅故漢州刺史宗裕都知兵馬使劉璋奉
禮蓋獲張全真張行立韓在田威等並宜追贈朕自
臨蜀國實庇齊民皆資先哲之威靈獲王故都之城
邑方憑幽贊以永天休上答宣功宜尊舊諱先主昭

昭主烈皇帝宜委中書門下追崇尊號 備冊儀忠
武侯諸葛亮別加美謚追贈王爵應有名山大川靈
祠聖跡皆豐凶所係水旱是司並宜追贈公侯用酬
宏既朕爰自統臨八國同心諸藩部落首領已下宜
差使臣各賜詔勅分物宣諭其見在鴻臚禮院入朝
藩客等各賜分物續有勅旨處分刺史縣令身皆受
職寵在分憂非唯效答于恩榮亦在保全于終始將
申報國只計安人其有徭役不均刑法不中鄉縣凋
弊稅賦逋懸必當分命使臣大明黜陟若清廉可獎

課績有聞或就轉官資或超加任用並舉勸懲之命
以彰悔過之名太倉及諸州縣受納斛斗並仰太府
寺准舊例校勘逐年給付所司除本分耗剩外不得
加一升一合致百姓積累逋懸如有固違必行朝典
其有外州遠縣官吏等輒徵估價並許百姓詣闕論
訴不計官職高卑並正刑名處分在京百司禁囚徒
推劾業成皆招本罪本官詳斷只據所申倘陷深文
便行極法或恐推司人吏抑遏代書既不坐其本情
實憲遭其在法自今後委御史臺常加寬察若有寬

濫便具奏聞又當別遣推窮重行懲罰致理之源無
先養老化民之本尤在恤孤或矜黃髮之年或念白
華之節衰老者宜加 卹孤嫠者亦在接安庶國內
有耆老年八十已上賜米二石九十已上賜米三石
百歲已上賜米五石兼綿絹酒肉者差並仰所在長
吏切加安存其有不孝者量與津置殯送仍接其孤
弱義夫節婦孝子順孫並加旌表門閭終身優假國
之教化庠序為先民之威儀禮樂為本廢之則道替
崇之則化行其國子監正令有司約故事速具修之

兼諸州舊有文宣王廟各仰崇飾以時釋奠應是前
朝舊制或有開國新規制勅之所未該教化之所未
備或刑法不中或倫叙有乖則諫臣不可不言宰執
不可不奏且諺云之設本俟諍臣匭函所收先覽寬
狀所以凡聞利病悉要聞知自今已後或事有便宜
理非允當並須旋具論奏共議改更必當留折檻以
旌賢否或懼觸鱗而避事應南郊行事亞獻終獻攝
事行禮官吏等改轉優賜並候續勅委分應飛龍閣
廐內作器仗諸雜工巧黃衣三衛四色細仗掌扇黃

鍾典趙等亦各委所司分析姓名申奏當議優賞駙
馬都尉普恩之後仍各賜一子六品正負官赦內有
未該恩例及合條 事伴各仰所司啓請施行開國
之初旣勤行於德惠改元之後尤企望于樂推惟是
革弊從新去華務實有利於民者不得不用有害於
政者不得除公平必致於民安富庶自成于國霸
息雖不悛法且無私赦宥者各仰自新矚業者皆宜
共守俾從滌蕩永致清平敢以赦前該恩事相告者
以其罪罪之挾藏軍器亡命山澤百日不前復罪如

初赦書日行五百里仍付所司牒至准赦故牒

錦里耆舊傳卷二起武成二年盡同光四年春

前紫川應靈縣令句 延慶 纂

二年大梁遣使通聘書曰夫唐虞致治遵禪讓之明文湯武開基允神人之至願必有神器是膺皇因況古今迭代之期英傑興隆之數莫不上闕天命下順人心啓王霸之宏基為子孫之大計咸遵軌轍並載簡編且念與皇帝八兄頃在前朝各封異姓土茅分裂皆超將相之尊魚雁往來久約弟兄之契歡盟甚固功業相推俄隔絕于音塵止回緣于間諜以至時

表土德運應全行雖手足胼胝粗平多難而聖辰符
瑞謀付朕躬當百辟之羣情極四方之積患受都河
洛用吞乾坤尋聞皇帝八兄奄有西陲盡朝三蜀別
尊位號復統為深一時皆賀于推崇兩國願頌于情
好徵曹劉之往制各有君臣追楚漢之前蹤帝分疆
宇所冀同清夷夏俱活生靈載籍具存恆張無爽玄
歲密聞風旨遐慰寤思憤岐隴之猖狂逼褒斜之封
徼欲資牽制用速掃除遂委永平軍節度使劉鄩特
遣行人先導深意旌已徑差精甲將擊妖巢合數鎮

之 雄鼓六師之威勢尋聞退遁殆至滅亡允諧特
角之謀尤得輔車之利近併覽同華奏報皆進呈褒
祥書題具悉事機良多欲沃今專馳仰列備達衷懷
重論金石之交別卜墳第之分山河共永日月長懸
瞻行好音言不盡意今遣光祿卿盧玘閣門副使少
府少監李元聊馳書幣重專或道途兼有徵禮具在
別幅謹白

馬一十匹紅纓子鞍轡各一事

紅耳叱驂馬一匹金玉鬧裝四垂鞍轡一副

紫叱驂馬一匹白玉裝鞍轡一副

白驄馬一匹金鍍開裝鞍轡一副

烏叱驂馬一匹金鍍龍鳳五垂銀鞍轡一副

烏叱驂馬一匹金鍍銀開裝鞍轡一副

白驄馬一匹金鍍銀開裝鞍轡一副

青叱驂馬一匹裏花五垂銀鞍轡一副

青叱驂馬一匹臨金玉五垂鞍轡一副

駟叱驂馬一匹金鍍開裝五垂銀鞍轡一副

紅耳叱驂馬一匹金鍍五垂開裝銀鞍轡一副

玉犀腰帶二條并雜物等

黃排方珮琳腰帶一條頭尾順缺十二事

通牡丹犀排方腰帶一條頭尾順缺十二事

金香一十斤 麝香五十斤

犀一十株 琥珀二十斤

玳瑁二百斤 金稜琉璃碗十隻

銀稜袂色鈔鑼二面 金花銀裝厨子一對

金花渾銀畏龍鳳儀注槍四條

金花銀畏龍鳳儀注槍四十條

金銅甲二副并副膊兜鍪金

藥物一十三味

茯苓一十斤

茯苓一十斤

酸棗仁五十斤

玉鹽五斤

新羅人參一十斤

牛膝一十斤

枳殼一十斤

五味子五斤

赤箭一十斤

鹿茸一十對

顆棗一千枚

羚羊角五對

牛黃一百銖

右件藥物等或來從燕市或貢自炎方或馨香能助于薰爐或華妙可資於寶玩至于光涵星斗藥有君臣願伸兩國之情重固千年之約愧非得禮粗達深衷特希檢留幸甚謹白

奏書

大蜀皇帝謹致書于大梁皇帝閣下竊念早歲與皇帝共逢昌運同事前朝俱榮倚注之恩並受安危之寄豈期王室如燬大事莫追橫流泛濫于八方表譽

凌夷于九廟此際与皇帝同分茅土共統邦家扶危
者力既不宣握兵者計無所出某忝列同盟之分幸
居平蜀之功所宜治兵甲以固封疆聚征賦以備進
貢望星使而經年不至指雲卿而就日無期遠聞皇
帝應天順人闢基立極拯生靈于塗炭示恩信于豚
魚東南之王氣咸歸河洛之殊祥畢至四門盡闢百
度唯貞竟忘意于興邦止施仁而濟物以此內量分
限不在經綸七十州自可指揮八千里半因開拓遂
至萬民叶議八國來朝爰徵史冊之文亦有變通之

說且東漢亂離之後三國齊興西周微弱之時六雄
競起俱非恃強逼禪皆以行道濟時雍容于揖讓之
前輕重于英雄之內况西蜀開山立國燒棧為謀稱
雄雖處于一隅避狄曾安于二帝鼎峙之規模尚在
山呼之氣象猶存永言梁蜀之歡合認弟兄之國今
蒙皇帝遠尋舊好專降嘉音坦無間諜之嫌再叙始
終之約疑慮則春冰共泮開通則東海可歸光榮邊
被于子孫暢遂咸敷于朝野今則盡焦勞而屬己用
勤儉以帥嘗瞻偃草之風以德用天之道又蒙厚

加賜貺別降珍奇十驥連鑣六龍並駕稱德曾忝于
萬乘呈才皆過于千金載觀德主之心並勵懷恩之
志寶帶輟異方之貢名香加遠國之珍奇鋒利過于
雪霜雅器價齊于金玉入用多慙于未識捧持方喜
于初觀望恩而一日三秋仰德而跬步千里自此崇
遵天路德遣星槎緘章不俟于飛鳶裂帛豈勞于繫
雁欣榮慰喜併集此時敬以專使靈鄉等回畧陳所
志幸望開覽謹白

謝信物等

右件鞍馬及腰帶甲冑槍劍麝臍琥珀玳瑁金
稜碗越瓷器并諸色藥物等皆大梁皇帝降使
賜貺雕鞍撼玉堅甲煉金十圍希世之珍六轡
絕塵之用槍森地櫛劍耀龍鋒金稜含寶梳之
光秘色抱青堯之響上藥非蜀都所紀名香從
外國稱奇遠有珍華並由惠好碩酬謝而增愧
仰渥澤以難昧捧閱品名實慚祇受

三年春冊皇太子

永平元年秋九月築柳堤

二年秋七月皇太子元膺作亂樞密使唐道襲等率兵敗之至翌日擒獲戮之于摩訶池畔 初五月二十三日丑時天上忽震一聲有電光飛數丈或明或滅皆云天狗也占其下殺萬人至是勦戮之數也斯驗矣

三年冬十二月雲南蠻寇邊大渡河至沅黎

四年春正月葭王將兵討之殺退溺河者不知其數歸降者三千餘人斬獲坦綽布燮清平官等收奪苑甲馬牛軍資財用八千餘事凱歌而還是月荆南高

令公發兵攻峽路嘉王率衆具戰艦沿流下峽未至葭州刺史王先成已殺退嘉王以王先成伐功侮慢斬而後奏帝甚怒之

天漢元年戎州累獠胡連等反七州捕盜使王球領兵討平之

先天元年春三月西域胡僧滿多三歲來游峨眉山旋歸西國 夏六月帝崩 太子衍即皇帝位改元乾德 秋八月 陵

元年春正月有事于南郊大赦國內 二月雲南遣

使朝貢 夏六月使虹入福感寺後堂內光輝照溢
廓宇良久而沒

二年春三月築子城西北夾寨堤引水入大內御溝
東流出仁政樓

五年春二月丙午日有食之

六年春雲南進江猪 夏四月于大內造村坊立市
肆令宮嬪著青布衫褙開酒肆食店雜男女之飾貨
柴麪一如民間叫噪爭打男女混雜交易而退帝與
諸后妃以為笑樂

咸康元年夏六月續添潤十二月曆日一紙印造施
行春初頒歷只以十二月暨夏方知唐朝歷日潤添
之也是歲遣翰林學士歐陽彬通聘洛京回在宗皇
帝遣客省使李嚴來備好殿朝見笏記曰伏自朱溫
肆逆運屬昭宗三年痛別于西秦一旦逼遷于東洛
誅殘南北焚蕪宮闈雖列藩悉是其唐臣此一處不
從其偽命由是大唐中興皇帝念高祖太宗之業條
爾隳張憤朱溫崔 之徒同謀篡弑逆乃神機迴費
心鼎獨然渴滄溟而捨戮鯨鯢芟林莽而決除虜兇

十年對壘萬陣交鋒慮久困于生靈乃選挑其死士
纜過汾水博王彥章于馬前旌及夷門斬朱友貞于
樓上劍霜未匣槍雪猶輝段凝統八萬雄師倒戈伏
死趙巖知一人應運引頸待誅逆使賊將寒心謀夫
拱手取軀坤只勞于八日救塗炭遂定于四雅備振
皇威咸遵帝力今則三秦貢表兩浙稱臣淮南陳附
拜之儀回乾備朝天之禮甫安宇宙便息干戈未盡
梟凶方議除剪豈謂大蜀皇帝柔懷遠迹居安慮危
喜我帝祚中興群妖悉滅特遣蘊張之士來追唐蜀

之歡吾皇回感于蜀皇復禮遠酬于厚禮則叨承元
造獲奉皇華載馳得面于天顏戰汗不任于地跼臣
無任感恩荷聖躋躍屏營之至 冬十月庚申朔甲

子帝幸天雄軍

秦川即天雄軍

文武臣僚諫諍不允駕至利

州唐國嘗大軍已至金牛帝大驚扈從百官旌各分
散輦轂倉皇奔馳歸國 十一月庚寅朔丙申帝歸
入內京城佛撓至壬寅唐國使李巖走馬入城宣唐
勅命安撫三軍萬姓又云六軍使齊王宗弼先已有
狀歸降興聖太子令見引領大軍相次即到帝与太

太后一時號泣左右悲哀帝遂召歐陽彬俯降表曰
臣聞滄海澄波納百谷朝宗之水皇風扇物來萬方
向化之人蓋由負罪不誅銜冤獲免鄭伯休焚棺之
惠許男荷解縛之仁得不頂戴寔是仰祈渥澤恭惟
皇帝陛下承乾啓運握鏡開圖發機而上應天心恤
物而下從民欲造十八祚崇隆之德高步泰階應一
千年挺特之風廣施王道混車書于天下走聲教于
域中而臣僻在遐方遠居蜀郡承先父經營之業為
巴人主者之司但荒僻替之迷罔顧危亡之患玉帛

既乘于正朔苞茅是闕于薦修殊不知唐德維新元
功再造致王師之遠尋勞雄武以遐臨太陽出而冰
雪自消霄澤敷而黔黎盡奉而臣自知罪孽不敢遁
逃命戎士以倒戈挈壺漿而塞路遂即舁棺麾下束
手馬前向丹闕以馳橫掩黃沙而聽命豈謂魏王布
惠真宰垂仁入臣境無犯纖毫向臣罪不加一二傳
陛下好生之旨闡堯天宥惡之文釋殘生于撲滅之燈
全必死於戮魚之鼎使肌骨重生于醒日焦枯再沐
于天波然則盡節輸誠安足以贖臣之罪塗肝碎膽

不足以報君之恩幸得捧日傾心歸明向化積懼而
鋒鉅聚首推忠而丹赤貫心今則已遠龜城將起鳳
關雖止家國喜歸有道之朝縱別鄉園幸在太平之
化臣以正月二日与母親并姨舅兄弟骨肉等發離
嘗道奔赴京師攀望聖慈無任瞻天仰德惶懼戰越
死罪之至普表後魏王車駕至漢州 乙巳王宗弼
領兵先入城是夜王宗弼遷帝于西宮至丙午自稱
兵馬留後散差人等以內庫金銀寶玩并諸王節相宅
內財物 戊申勅賜曰朕以蜀部封疆本是我唐境

土爰從兵革遠阻江山當偽梁篡弒之時致宗廟陵
夷之難遂滋割據益逐便安雖行建誅之謀乃是從
權之道况復蜀主先父素是本朝舊臣常懷忠孝之
心每俟興隆之運唯期恢復却效傾輸朕以初殄寇
讐重興社稷揆諭之恩既廣憂勤之意常深須務綏
和貴諧混一遂令元子兼命宰臣遠安後后之心既
叶未王之願遐想王師行李已及彼地城池遠降詔
書明行示諭料其素志必契夙心當符魚水之歡永
保山河之誓一應偽蜀文武官僚等或本朝舊族或

當代英賢或抱節于軍戎或者名于鄉曲久從睽隔
常軫情懷宜知乃瞻之恩各勵輸誠之款今以降勅
命誠約諸道兵師如西川果決歸降到城不得驚擾
但思効順勿致懷疑 己酉齊王宗弼斬東道院開
府宗光嗣西院開府景潤澄北院開府歐陽晃成都
尹韓昭等出降示奉魏王敕令宗光嗣等久居內廷
恣行權柄忒惑少主滅削三軍仰盡斬訖奏 甲寅
蜀主內宰臣王鎔文武百官素服銜璧牽羊輿觀出
城降魏王太子于是焚榷釋罪望北拜恩却掃入城

魏王遣李嚴于三市慰諭軍人百姓 丁巳魏王興
聖太子入城 閏十二月己丑朔斬偽齊王宗弼并
男駙馬都尉承班等榜曰 竊以前件人等擅廢本
主專殺內臣潛取資財將為己物爰自收降城邑又
無犒賞三軍俱是元兇須加顯戮初王宗弼多收內
庫并諸節將宅寶貨于城外獻魏王及招討郭令公
魏王曰蜀之山河皆我家之有方欲普施惠化何用
寶貨 為遂不受至是誅之又斬秦州節度使王承
休以其備行官迎蜀主又引軍收蜀竊以王承休食

人之祿于國不忠貴擁節旄位居屏翰飾宮室以誤
主引師旅而收城悖逆之深莫甚于此豈可君遷臣
在國改寧存顯示梟夷神人懽快

同光四年春正月戊午朔前戎州刺史蕭懷武眉州
刺史鮮于皋作亂擒獲與從皆伏誅 庚申蜀主及
太后嬪妃宰臣王錯唐傳素張格許宓等進發入洛
歸朝 甲子走馬使到宣勅斬招討使郭崇韜父子
四人為列蜀取豪富家金錢馱載歸京闕戊申奏遂
降勅誅之 甲戌北都留守孟知祥除授同中書門

下平章事充劍南西川節度使到省

戊寅魏王以

孟公至大慈寺拜僖宗御容又至延祥院見偽蜀少

主真容並令掃抹別塑北方天王一身至今存焉

庚寅魏王崇離成都歸京至綿州唐延孝以殿後軍作
亂回趨成都屯廣漢川王頗有憂色護軍焦彥賓指
畫討伐于東川節度使董璋會軍擒康延孝送至利
州魏王斬之於是兩川平定 夏四月丁亥朔己丑
蜀主与母徐氏太后諸王公 嬪妃至雍州時莊宗
出征王皇后矯詔就秦川驛害之至明宗朝追封順

正公葬于京兆府三趙村是月明宗即帝位改元
天成元年甲午魏王平蜀回至渭南諸軍潰散為帳
下親軍所縊

錦里耆舊傳卷二



錦里耆舊傳卷三

起天
成二年
至
廣政
二十五年

前崇川應靈縣令勾

延慶 纂

二年春二月壬午朔己亥川主斬兩川監軍使李嚴
時明宗篡位川主以前朝懿戚心不自安至是內容
省李嚴承樞密使安重海密旨貯圖謀之意添鄰部
綱羅于兩川乃斬之聞奏自是方思割據厲兵秣馬
与東川董相公璋論秦晋之親結唇齒之約

二年冬築羊馬城

四年春飢荒米斛四百文



長興元年秋兩川起兵討逆府利潤并黔南夔萬等
州榜示曰 蓋聞皇王御下恩信垂而叛離臣子事
君猜忌生而權變固不可刮席以忍耻膠柱而移音
開戶牖以啓式長根芽而稔患以至舉戈問罪誓衆
言征虜庇齊民武求多福某國朝懿威受命莊宗自
節制于西川遇易移于東洛且以時變則變喪君有
君曰盡節而傾誠遂梯航而入貢五年之內發運無
虛積數五十萬緡粗給中朝之費此則勵勤勞于天
子欲表率乎諸侯宇內皆知人誰不見至于屢加官

秩亦荷寵光不幸間謀潛興窺覲顯露于閩中而立
節就列鎮以益兵搖動我軍民控扼我吭背頻將異
議累具上聞冀少軫于懷柔希稍安于方面而朝廷
不以為德轉深其疑竟垂魚水之歡自絕雲龍之契
某与東川相公已联姻好况密封圻朝同雞犬之聲
暮接笳鼙之響地里雖分于兩鎮人心何異於一家
勢比同州事資共濟今與東川點檢馬步軍十五萬
人騎分路往武信利潤路黔夔等州向逆制置之由
与興屯集之衆其行法師令別載章條務期晏安寧必

無侵雲况王氏開國久霸成都東則鐵鍊于瞿塘北則
泥封于大散自是子孫失守將相離心合在蜀之丞
人固未忘於霸主回衆多之感舊奮武旅以開疆佇
遣四民各安其業然後花林步月錦水行春繁華何
讓于往年爵祿重新于此日凡百士庶宜體端倪
秋九月辛酉朔丙戌收下閬州榜曰 昨者兩川以
朝廷自生疑貳不體忠良信讒賊之間言致諸侯之
離德始則閬州節度使李仁矩兩來奉使頻此覘窺
謂于果閬之間便是控臨之地安興謀畫濫置節旄

及奸計之遂心猶陰邪而未已數聞奏報背請兵師
欲結禍階自為戎首所以東川相公憲其稔惡須議
推先連興貔虎之師共破豺狼之窟自今月二十九
日酉時得東川相公來書云二十五日夜三更三點
親領兩川大軍四面圍農攻打閬州城池至其日平
明打破斫到李仁矩首級并捉到都指揮使姚洪馬
軍指揮使王景步軍指揮使費暉等訖餘城下見樓
來投指揮使都頭已下便與賞給安存兼本城軍人
百姓並不傷動外餘拒敵黨類殺戮無餘此則天贊

兵威人叶勇力遂至元兗斬首同惡就擒我師四合以環圍逆壘一攻而瓦解捷書雷迅喜氣山橫想與士民同多慶快見便乘勝前進收利州只期反掌之間便俟克敵之捷 冬十月辛卯朔辛亥右廂馬步都指揮使張業收下夔州并黔州榜示曰 今月二十一日據峽路行營討伐招收使狀報黔南節度使去今月二十七日將手下元戎兵士拋本州下水奔竄尋差衛隊指揮使朱偃部領左右飛棹並諸指揮兵士乘戰船十五隻往黔南安慰至今月二日午

時回其黔南節度使今見在梁溪圍黔元隨兵士及旌添水軍却有五百餘人排比小戰船候寧江接應兵士到却欲歸復本州其朱偃當日辰時步領戰船往渠溪襲逐至午時與賊軍相見交戰趁下水約百餘里至黔都坝頭殺獲賊軍一百餘人斬黔南內外都指揮使郭太尉吳近思張瓊等三十餘人奪得衣甲器械不少收獲牌印四副其黔南節度使則攜餘黨乘小舟沿流直下忠州者竊以大舉舟師遠征峽路旗鼓纓罔其下瀨雲僑尋指于上游連降郡城

收營監勢且捷于破竹聲有類于藝蓬今則更閱捷
書屢聞勝策况寧江軍以黔南為肘臂之地以渝合
為饋運之衝我已斷之彼何望矣節師乘城而竄遁
裨將兼隊而追擒數俘馘以既多收鎧甲而亦衆指
期蕩定以固封隅凡曰軍民攸同快慰 十一月左
廂馬步都指揮使趙廷隨隱收下利州十二月左右
廂馬步都指揮使李仁罕打破遂州殺節度使夏魯
奇于是朝廷夷東川董相公一族

二年天子歸罪安重誨後川主却脩職貢

三年夏四月辛巳東川董相公擁兵來襲我至漢州
昭武軍節度使趙廷隱討平之勝示曰 盖聞皇天
無親惟德是輔明神不昧稔惡則亡逆賊東川節度
使董璋包藏貳心負背盟約暴興士馬亟寇封圻迎
鋒而尋滅全軍單馬而竄歸本府昭武司徒統領大
衆追襲餘妖則有前陵州刺史王暉覩其將亡回圖
轉禍梟斬董璋父子雙獻其元克保軍城待余旌旆
念其智勇足可嘉稱且謀不自于衆人罪止歸于元
惡既除心腹之患永固邦國之基某見親往東川慰

諭君民 六月軍府將吏等詣衙陳狀請川王令公
通押兩川公事

四年春觀察判官徐光溥上疏請行墨制曰 伏以
我蜀被山帶江足食足兵實天下之強國也我公本仁
祖義允文允武乃天下之賢主也以我公之賢拓土
開封取威定霸固得其宜矣而況內則有紅蓮上客
參帷幄之謀外則仗細柳將軍專斧鉞之任率土之
內足可保磐石之固泰山之安顧惟冗賤何補高明
但念智者百慮必有一失愚者百慮必有一得狂夫

之言聖人擇之樵童之歌哲王聽焉敢罄芻詞誠慚
管見仰干朗鑒伏切怔忡竊以惟賞与刑國之利器
懲惡勸善君之要權不可偏行尤須具舉歷觀往典
備考前規或王命而不通或公室以多難列國率聞
于專制諸侯或可以從權苟有利于生靈又何辭於
通變昔來歙鄧禹擅命于征伐之間蜀主岐王承制
于隔絕之際 已實欲安人昨鄰近諸藩間謀
上國有帑視狼貪之意阻君臣魚水之歡添益兵師
動搖生聚況我公恒脩貢職不虧楚子之茅遽構讒

邪竟擲曾參之杼以至兩川軟血合縱連衡列校齊
心奉辭伐罪今則旋平狄穴漸拓鴻基立功者悲望
昇榮向化者皆思叙進方屬途路有阻恩信未通二
星不見於雲霄三蜀久憊於雨雪將期勸善即在報
功疇庸合議於策勳列爵宜遵於故事自今以後若
且行墨制以布鴻恩式副羣情無虧大體先宜曉諭
後可施行所冀設爵待功免授踰時之賞允協稱霸
之宜 秋七月唐國進封蜀王冊曰朕祇受天眷虔
荷帝圖敷大信而仰法昊穹秉玉公而俯臨億兆

善殫惡必分涇渭之流崇德報功敢忘山河之誓其
有榮聯戚里任重侯藩佐白水而中興為皇家而盡
節雖勞緣往誤而竟保忠貞疏鑿未通潮海之波瀾
暫阻氛霾既定拱辰之光耀如初表章皆驗於推誠
琛賁遠脩於述職得不顯其丹赤懋以旌酬益敷魚
水之歡永契君臣之道爰求吉日乃降徽章具官孟
某五緯佐天三山鎮地七年乃辨真為梁棟之材十
德俱全信是琮璜之器先皇帝經綸八極濟浴兆人
李通首述其偉書鄧禹常忝于霸業同心同德竟扶

歸馬之朝不伐不矜因恃濯龍之寵洎朕慕承鳳紀
翳爾鎮守龍城鉄石弥堅菁茅不匱山川險絕每虔
白日之心玉帛駁奔來助郊天之禮有臣若此當代
何加董璋久作厲階終萌逆節既辜恩于覆載欲嫁
禍於勳賢疊以封章疏其鄰道虔劉我生聚離間我
忠良爾外示叶同潛懷憤激表罄言而誘諭彼既不
回伺良便以誅鋤乃期自雪以致敢驅叛黨徑逼仁
封吹虺毒以傷神奮豺牙而暴物爾則妙施成筭徑
出金師輦鼓纜鳴旋聞落爪窠巢自潰已致噬臍梓

州之妖氣風驅涪水之狂波鏡淨解吾宵旰賴爾韜
鈴固當銘在景鐘豈止光於信史況復備輸懇款益
驗傾虔叙魯館之黃緣述沛中之事舊深心可見亮
節期載不有疾風烏知勁草倘無異數曷報崇庸由
是並策將壇顯陞王爵兼兩藩之奧壤啓一字之真
封仍循益地之通規別改旌功之懿號賜之旌鉞冊
以輅車雖加等之寵光爾皆不忝在睦親之義分予
亦無慙於戲天鑒甚明為善者降之福祉君恩不黨
立勳者厚以獎酬唯敬慎乎始終可延長於富貴勉

承兌澤來鎮坤維可授依前檢校太尉兼中書令行成
都尹劍南東西兩川節度使管内營田觀察處置統押
近界諸蠻兼西山八國雲南安撫制置等使仍封蜀
王加食邑一千五百戶實封二百戶改賜忠貞匡國
保大功臣散官勳如故仍令所司擇日備禮冊命主
者施行 秋八月下教曰 取威定霸乃公侯權變
之方捨爵策勳乃皇王叙酬之典其或兵屯萬旅地
廣三川周環列國之山河奄有全蜀之封部倘不從
權而徇衆則稽錄効以報功今稟命于中朝得專制

而行賞但念承世家之餘慶受旌鉞之殊榮自領成
都于前奉紀窮奢極侈固哉意而不為諱武教民在安
邊而有作往歲方勤述職務係永圖不幸諸藩構成深
隙此際主兵將帥爭陳排亂之功運策實僚咸展出奇
之略因興武旅以為染髒累破竹以焚枯連開疆而拓土
其次諸司奉職庶吏推誠咸著勳勞豈忘獎答又昨聖上
以顯分忠佞逆降冊封礪岳帶河銘大君之異寵輅車
珠冕表列國之殊榮仍示優崇俾行墨制上自藩方
之任下及州縣之官凡黜陟幽明許先行而後奏自

可保不僭不濫之典賞立功立事之人必無患於不
均庶有覲於允當布告遐邇咸使聞知

長興五年夏四月文武勸進即皇帝位大赦國內改
唐長興五年為明德元年以副使趙季良為相掌書
記母昭商為御史中丞掌書記李昊觀察判官徐光
溥翰林學士左右馬步軍都指揮使李仁罕趙廷隱
張業侯洪實分掌軍推 夏四月庚午朔地震興元
節度使張戛劉武定節度使孫漢韶率部來歸由是
盡得山南土宇兵甲 秋七月己亥朔甲子帝寢疾

而崩葬和陵廟號高祖遺制冊元子昶于柩前即皇
帝位年十六翌日殺李仁罕并其左右佞者宋讓等
數人初仁罕入蜀後充馬步軍都指揮使恣為奢豪
前蜀主元妃有國色欲娶之又懼高祖至是乃有跋
扈之意樞密使王處回左廂馬步都指揮使趙廷隱
憲其難作遂請殺之

三年春三月地震

四年晉高祖發兵侵昭武至劍門保寧軍節度使趙
廷隱領兵拒退之是歲改為廣政元年 秋八月大

水

二年三年邊陲無擾百姓豐肥以輔相得人也
四年夏四月蝗

五年春閏三月甲申西域胡僧來朝

六年至九年大有

十年秋七月殺宰相張業以其判度支虐徵商稅于
是籍沒其家樞密使侍中王處回免官致仕上以翰
林學士李昊徐光溥為相王昭遠為通奏使知樞密
院事

上始親臨庶政是月秦川節度使何重建鳳州節度
使石奉頽率所部來歸

十一年十二年時平俗阜

十三年春始置貢舉

十五年夏六月大水入京城漂蕩五門以其城內溺
死者衆于是大赦境內 秋七月東川兵馬都監王
承丕反殺知府刑部侍郎郭延鈞并家族于是都指
揮孫欽率手下兵士斬王承丕首級奏送宣差容省
使趙季札往梓州安慰夷王承丕家族

十八年冬上國舉兵攻秦州蜀失之
十九年戎瀘州獠賊羅駐雍及左街都巡檢使趙季
文討降之

二十一年昌州獠反殺巡檢使趙漢瓊等于是左累
巡檢使申彥瑋討平之

二十四年冊皇太子

二十五年行用鐵錢

錦里耆舊傳卷三

錦里耆舊傳卷四

四起偽蜀廣政二十八年冬至乾德四年春

前榮州應靈縣令勾延慶纂

國朝收蜀十二月癸亥偽蜀太子秦王 詰統領兵

士至劍門時招武諸路兵馬並已奔退遂回入城

正月癸酉前軍都部署王太傅全斌統領大軍至漢

州界 蜀主羞偽通奏使伊審微走馬送降款 十

七日前軍都署尋請先鋒都監康延澤入城安撫

十九日大軍至昇僊蜀主具禮降 二月四日南路

戰棹都部署劉太傅光又收峽路至府是歲大守軋

德三年也 十七日蜀主與偽太后妃嬪發離成都
水路下峽朝天先差弟偽雅王仁贇北路走馬奉表
曰 臣聞三皇御宇萬都郡歸有道之君五帝垂衣以
合順無為之化其或未知歷數猶昧存亡致興天討
之師實懼靈臨之罪敢祈英睿俯聽哀鳴臣誠驚誠
懼頓首頓首伏念生自并門長於蜀地幸以先君之
基構得從幼歲以纂承只知四序以推遷不識三靈
之改卜伏自皇帝陛下大明出震盛德居乾聲教被
于遐荒慶澤流於中夏當凝旒玉殿之始闢以小事

天之儀洎告類 圓丘已來稽執玉持帛之禮蓋蜀
地居遐僻阻隔徽猷已慙先見之明曰有後時之責
今則皇威赫怒聖畧風行干戈所指而無前輦鼓纜
臨而自潰山河郡縣半入于提封將卒倉儲幸歸于
文籍但念臣中外二百餘口慈母七十餘年日承訓
撫之恩粗効孝慈之道實願克終甘旨冀保養 其
次則子孫之團圓守血食之祭祀伏乞皇帝陛下容
之若地蓋之如天特軫仁慈以寬危辱臣輒敢微其
故實上瀆宸聰竊念劉禪有安樂之封叔寶有長城

之歸背恩歸款得獲生全願眇昧之餘魂得保全而
為幸庶使先君寢廟不為推採之場老母庭除且有
向安之便見今保全府庫巡邊軍城不使毀傷終期
臨照車書混其文軌正朔奉于靈臺敢布腹心恭聽
赦宥臣謹率文武見任職負望闕拜首上表歸命披
瀝肝肺以聞 又上宰臣樞密使狀 竊念頃自北
京即隨先子洎臨西蜀嗣守餘基自量小國之封疆
常阻大朝之正朔伏自皇帝登位宸極禮盛郊禋令
預梯航願同臨照而以阻遙障險稍易歲時今則遠

勞王師恭行天討有征無戰詎可抗威棄甲倒戈尋
皆効順具陳降款上達冕旒所希者存濟活於蒼生
報効勞於老母忠惟奉主孝則養親固于生平無所
覬望許男銜璧已蒙解釋之儀雲舜垂衣佇保安全
之望丹誠備寫雪涕難勝伏惟某官叶贊萬機懷柔
八表迴孚恩信並及幽遐願垂前席之言特加敷奏
冀遂保家之懇終養晨昏烏反哺以知恩竊將比喻
雀銜環而報德以荷生成倚賴感銘陳詞因盡遐瞻
德宇但瀝虔誠今專遣親弟仁贄詣闕上表待罪敕

蜀主省上表率文武見任官等望闕滙懇歸命事具
悉朕自皇天眷命率土樂推將期德報萬方不恃威
加四海乃睦益部僻處一隅苟黎庶之獲安非經營
之在意一昨灾纏蜀地釁自并門既興王者之師遂
授將軍之鉞事非獲已須用至兵我具真詞彼衆自
敗下劍門而賈勇指井絡以長驅中宵火然北庭何
罪經馳驛騎嚴戒前鋒廣宣來者之懷徧諭弔民之
意果能率官屬而効順拜疏表以祈息託我慈親述
乃寢廟封府庫而待罪保生聚以輸誠朕方示信懷

來不逼人險保無它慮當體優隆國有舊章不違來
請所宜悉也春寒想比清休書旨不多及 四月一
日殺西川兵士三萬人初前軍都部署琅邪公受降
入城後應是西川歸降兵士並皆安撫相以點齧要
起費赴京泉軍動搖將謀作亂乃引就夾城內點揀
俾其不意遂盡殺之 參政呂侍郎餘慶知成都府
軍府事偽蜀指揮使全師雄及自稱王據漢州金堂
縣三學山聚徒數萬人攻成都并諸縣占官軍格門
又陵州賊表廷裕及資州黃承浦普州劉澤時人號

之劉硬弓昌州趙令等及各據本州與全師雄接應
所在州郡道路不通又嘉州馬承遠反屯犍為山進
攻州城前軍戰掉副部署武懷節擊破之盡戮徒黨
夏五月十六日蜀主到京朝見皇帝外時御大明殿
蜀主見左右金吾六軍儀仗殿中省法物並于殿前
卓立三軍于明德門外著隊排立蜀主并弟仁贇男
季誥等宰臣李昊已下三十三人五更三點自玉律
圍乘馬到明德門西廊幕次下馬至寅時著白衫小
帽子勒帛詣明德門立班閤門使李廷憲至蜀主遣
官屬一員持表待罪將入大內奉傳宣旨釋放敕示
諭並俯伏于地令通事令人持起有敕取法上天廣
覆下土既叶混同之慶永垂臨貺之先方喜來朝何
勞俟罪體亦眷待無至競憂蜀主已下謝恩訖奉宣
賜衣服幘頭靴笏等謝恩却歸幕次換衣服冠帶各
乘馬入厚載門右銀臺門下馬閤門使李廷憲引蜀
主入明德殿外幕次祇候見蜀主進

金器八百兩

玉腰帶二條

銀錠一萬兩

集賢相公叅知政事侍郎及文武官已下江南兩浙
進奉使並立班陪位稱賀宣徽使承旨奉禮畢索扇
下簾皇帝歸內皇帝自大內乘逍遙子上明德樓宣
詔蜀王已下上樓立班奉宣慰諭諸軍于樓前逐隊
安歸營後却乘逍遙子赴大明殿宴奉宣宰臣蜀王
已下並赴宴勅教坊樂蜀王進

金酒器一副重一百六十兩

通龍鳳犀腰帶一條

宰臣節相已下進賀

蜀王朝見宣賜蜀王

衣一副六件

玉腰帶一條

金鞍轡馬一匹

散馬五匹

絹五千疋

錦綺綾羅紗縠衣著一千疋

錢三千貫文

金鍍銀稜器四百事

銀漆稜器千六百事

素漆器五百事

錦繡被褥褥二副

宅一院四百八十間

鋪程借用什物全

又賜國母李氏

衣一對

金器三百兩

絹一千疋

借用銀器一千兩

錦被纒褥鋪陳全

蜀主弟仁贇仁裕仁恭男手詰手猛各賜

衣一襲

幞頭靴笏等

玉腰帶

銀器各七百五十兩

衣著各五百疋

絹各一百疋

散馬各一匹

金鍍銀鞍馬各一疋

錦被纒褥鋪陳全

雅王孟仁贇別宣賜

交椅水罐銀大燎爐并銀器二百五十兩

尋有除目

李昊工部尚書

母守素工部侍郎

張元倣工部郎中

歐陽炯左散騎常侍

胡韞司天少監

郭徵膳部郎中

韓保昇殿中監

高諷太府卿

尹文舉駕部郎中

范禹偁鴻臚卿

劉嵩少府監

韓嶼庫部郎中

鮮于捺祠部員外郎

趙允拱雲部員外郎

邱世隆比部員外郎

孟仁贇右神武軍統軍

孟仁搽左監門衛上將軍

孟仁裕右監門衛上將軍

孟彥珪左千牛衛上將軍

王昭遠右千牛衛上將軍

李進右千牛衛大將軍

龍處璠左羽林衛大將軍

表可鈞左屯衛大將軍

高延昭左驍銳大將軍

蘓廷超清道率府率

李遵皓左監門率府率

授蜀王秦國公制

門下伯島導以黑水本梁州之域河因枯象岷山直
井絡之墟考職方之地圖比劍南之徼道屬中原多
故遠服未賓遂部裂於山河競僭竊于位號聯制平
寓縣重正皇綱復周漢之舊疆寵綬羣后採唐虞之

大訓協和萬邦六年于莽百揆時欽叙禮樂征伐之
柄盡出朝廷要荒山澤之君咸脩職貢一昨援長康
而受律法時雨以興師舜平暫翦於兩階湯網豁開
于三面弔伐民之罪朕無愧焉咨尔偽蜀主孟昶挺
生公族稟慶侯門值唐朝將季之辰襲冒土已成之
業撫彼郡邑久曆歲華而能察天地之惡盈知神人
之助順盡率羣吏來降大君望北以拜章指南陔而
請命得不開懷禮遇撫弱流恩官班特越于彛章保
護弥先于大信豈比夫魏封劉禪後升驃騎之班隋

待蕭琮惟列莒公之號今茲示寵以欲從人命作帝
師俾容開府帶漢相專車之貴列秦川萬戶之封併
而授之斯為異數仍加祿俸用表優隆尔宜思前代
之命官體我朝之加等勉荷非常之澤無忘匪懈之
心服佩恩光往踐厥位可封秦國公
授孟平喆充節度使制

門下朕聞魏將降蜀君臣俱列于散官隋帝平陳子
弟不聞于封爵皇家順景風而行賞同時雨以濟師
嘗敵境未賓霆下戒嚴之令暨危邦請命雲垂利澤

之恩矧復降婁古封掌武崇秩曲阜是伯禽之國太尉乃周勃之官山河距九州之雄綬冕冠三公之貴舉為賞典斯實異恩蜀國長子孟孚詰禮法矜莊神彩英秀駛脩途于早歲播令聞于蜀川正朔未同于列國而人稱世子車書既混于大朝而自是良臣以爾昔在三川常居二職贊厥父之効順保祖母之高年予嘉乃心豈限彝制是命陟將壇于東夏整武事于南宮憲秩封侯用光殊渥將表臨戎之寄更增光祿之勳爾其分天子之憂勤出將軍之號令與其改

弦而易調不若從容以安民布政頒條予誠有望榮家奉國爾其勉之

夏六月蜀主薨遣表曰

臣聞大數有限萬化無窮歷觀今古以攸同在賢愚而不免將啓手以歸土再瀝懇而問天臣誠悲誠恐頓首頓首伏念臣謬承父業竊據坤維數千里之山河四十年之統攝雖有臨深之懼且無事大之規是以遠勞王師恭行天討上思老母下念民生潛收拒轍之心旋露投戈之請伏惟皇帝陛下納汗道道廣來

遠恩寬遐頒彩鳳之書遽釋牽羊之罪伏自遠辭錦
里獲覩瑤墀帝澤天恩曾無虛日皇華驛騎長是盈
門仍賜官勳方因朝謝不謂偶蒙疾疹遽覺沉微乃
蒙皇帝陛下軫睿念以殊深降國醫而荐至此冀稍
同瘳損何期漸見弥留將別聖朝即歸幽壤絕拜章
于雙闕一息雖存命易簣于病躬五神已耗伏惟皇
帝陛下長新鳳歷永霸鴻圖鎮居四海之尊終作兆
民之慶臣之老母臣之遺孤仰荷聖恩夫復何憂臣
無任瞻天戀聖涕泗急切屏營之至

夏六月十九日崇州賊楊德暉等及陵州表廷裕助
五千餘人圍逼州城是月二十六日南路都部署彭
城公討平陵州賊表廷裕二十九日楊德暉潰散所
在縣鎮遮截梟 畧盡 秋九月嘉州指揮使呂翰
友殺前軍戰掉副部署武懷節據州城自稱相府是
月漢州山菁賊全師雄死徒黨潰散 冬十一月彭
城公擊呂翰破之收下嘉州


四年春三月賓州賊黃承浦崇州賊楊德暉等歸投
起遣上京自楊德暉趙令等脅從夷獠依附山林擁

衆叛離不順朝化南路都部署彭城公命偏將討平
之今則汙萊之囚盡闢荏苒之盜漸除萬民知歸而
蜀寧靜觀堯湯之代懽億兆之心矣

錦里耆舊傳卷四

蜀
耆
舊
傳

國家圖書館, NATIONAL CENTRAL LIBRARY, TAIWAN, R.O.C.



貞齋書錄解題

蜀樽祝十卷

殿中侍御史裏行新建張唐英次功撰唐吳自稱黃杉子
音其天與見克也



國家圖書館, NATIONAL CENTRAL LIBRARY, TAIWAN, R.O.C.